

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 26/5

5 մայիսի 2017թ.

Քննարկվեց «ՎՍ ԵՎ ԱՆԻ ՅԱՐԴ ՍԱ» ՓԲԸ տնօրենի գանգատը ՀՀ ԿԱ ՊԵԿ աշխատակազմի իրավաբանական վարչության պետի 09.03.2017թ. թիվ 346330/03 որոշման դեմ:

«ՎՍ ԵՎ ԱՆԻ ՅԱՐԴ ՍԱ» ՓԲԸ տնօրենի գանգատում բերված փաստարկները.

ՀՀ ԿԱ ՊԵԿ իրավաբանական վարչության պետի կողմից 09.03.2017թ. կայացվել է «Վարչական իրավախախտման գործի վերաբերյալ» թիվ 346330/03 որոշումը (այսուհետ նաև՝ Որոշում), որով կիրառվել է վարչական տույժ՝ նշանակվել է տուգանք 20.000 (քսան հազար) ՀՀ դրամի չափով՝ հիմք ընդունելով Վարչական իրավախախտումների վերաբերյալ ՀՀ օրենսգրքի 169.2-րդ հոդվածը:

Որոշման մեջ նշված է, որ «ՎՍ ԵՎ ԱՆԻ ՅԱՐԴ ՍԱ» ՓԲԸ-ի (այսուհետ նաև՝ Ընկերություն) կողմից 2016թ. դեկտեմբեր ամսին ԵՏՄ անդամ երկրի հետ իրականացրած առևտրի վերաբերյալ գործարքի գծով չի ներկայացվել վիճակագրական հաշվետվություն, որն էլ հենց դիտվել է որպես տվյալ վարչական տուգանքն առաջացնող արարք:

Ընկերության կողմից 21.12.2016թ. թիվ 262-0752 9152 ավիաբեռնագրով արտահանված ապրանքներն իրենից ներկայացնում են նմուշներ և բեռնագրում (ուղեկցող փաստաթղթում) գործարքի կողմերը նկարագրված են որպես առաքող ու ստացող (այլ ոչ թե վաճառող ու գնորդ) և հստակ նշված է, որ ապրանքի գինը վճարման ենթակա չէ:

Համաձայն ԵՏՄ անդամ երկրների արտաքին առևտրի և մաքսային վիճակագրության վարման միասնական մեթոդոլոգիայի 8-րդ հոդվածի 8.1.3 կետի 12-րդ ենթակետի՝ նմուշների արտահանումը չի առաջացնում վիճակագրական հաշվետվություն ներկայացնելու պարտավորություն:

Հարկ է շեշտել, որ ՀՀ կառավարության 23.04.2014թ. թիվ 447-Ն որոշումը կարգավորում է ՀՀ-ի և Մաքսային միության ու Միասնական տնտեսական տարածքի անդամ պետությունների միջև փոխադարձ առևտրի վիճակագրության վարման կարգի հետ կապված հարաբերությունները: Հետևաբար, նմուշի արտահանման դեպքում կիրառելի չեն թիվ 447-Ն որոշմամբ հաստատված կանոնները, քանի որ բացակայում է փոխադարձ առևտրի հանգամանքը: Հետևաբար, Ընկերությունը չկրելով վիճակագրական հաշվետվություն ներկայացնելու պարտավորություն, այն չներկայացնելով՝ որևէ վարչական իրավախախտում չի կատարել:

Ելնելով վերոշարադրյալից՝ գանգատաբերը խնդրում է բեկանել ՀՀ ԿԱ ՊԵԿ իրավաբանական վարչության պետի 09.03.2017թ. թիվ 346330/03 որոշումը և կարճել վարչական վարույթի գործը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննելով վարչական իրավախախտման վերաբերյալ 09.03.2017թ. թիվ 476 արձանագրությունը և կից նյութերը պարզել է, որ «ՎՍ ԵՎ ԱՆԻ ՅԱՐԴ ՍԱ» ՓԲԸ տնօրեն Արթուր Ներսիսյանը 2016թ. դեկտեմբեր ամսվա ԵՏՄ անդամ երկրների հետ իրականացված առևտրի վերաբերյալ վիճակագրական հաշվետվությունը «Մաքսային կարգավորման մասին» ՀՀ օրենքի 60-րդ հոդվածի 4-րդ մասով սահմանված ժամկետում չի ներկայացրել հարկային մարմին:

Նկատի ունենալով, որ արարքը նախատեսված է Վարչական իրավախախտումների վերաբերյալ ՀՀ օրենսգրքի 169²-րդ հոդվածի 1-ին մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ԿԱ ՊԵԿ աշխատակազմի իրավաբանական վարչության պետի կողմից 09.03.2017թ. ընդունվել է վարչական իրավախախտման գործի վերաբերյալ թիվ 346330/03 որոշումը, որով Արթուր Ներսիսյանը ենթարկվել է վարչական պատասխանատվության՝ գումարով 20.000 դրամի չափով:

Վերոգյալի կապակցությամբ հարկ է նշել հետևյալը.

«Մաքսային կարգավորման մասին» ՀՀ օրենքի 60-րդ հոդվածի 4-րդ մասի համաձայն՝ Հայաստանի Հանրապետության և Միության անդամ պետությունների միջև փոխադարձ առևտրի վերաբերյալ Հայաստանի Հանրապետության կառավարության սահմանած վիճակագրական տեղեկատվությունը ներկայացվում է մաքսային մարմին՝ Հայաստանի Հանրապետության կառավարության սահմանած կարգով՝ ոչ ուշ, քան ապրանքների առաքման (ստացման) ամսվան հաջորդող ամսվա 10-ը:

ՀՀ կառավարության 2014 թվականի ապրիլի 23-ի N 447-Ն որոշմամբ հաստատված Հայաստանի Հանրապետության և Մաքսային միության ու Միասնական տնտեսական տարածքի անդամ պետությունների միջև փոխադարձ առևտրի վիճակագրության վարման կանոնների 5-րդ կետի համաձայն՝ Հայաստանի Հանրապետության և Մաքսային միության ու Միասնական տնտեսական տարածքի անդամ պետությունների միջև փոխադարձ առևտրի մասին պաշտոնական վիճակագրական տեղեկատվության ձևավորումն իրականացվում է ապրանքների փոխադրման հաշվառման վիճակագրական ձևում արտացոլված տվյալների հիման վրա:

«Իրավական ակտերի մասին» ՀՀ օրենքի 86-րդ հոդվածի 1-ին մասի համաձայն՝ իրավական ակտը մեկնաբանվում է դրանում պարունակվող բառերի և արտահայտությունների տառացի նշանակությամբ՝ հաշվի առնելով օրենքի պահանջները: Իրավական ակտի մեկնաբանությամբ չպետք է փոփոխվի դրա իմաստը:

Քննարկվող դեպքում Ընկերության կողմից 21.12.2016թ. թիվ 262-0752 9152 ավիաբեռնագրով արտահանված ապրանքները (ալկոհոլային խմիչքներ) հանդիսացել

են նմուշներ, որոնց ընդհանուր քանակը կազմել է 138 շիշ, իսկ ընդհանուր գումարը՝ 66.000 դրամ: Ընդ որում, բեռնագրում գործարքի կողմերը նշված են որպես առաքող ու ստացող (այլ ոչ թե վաճառող ու գնորդ), ինչպես նաև նշված է, որ ապրանքի գինը վճարման ենթակա չէ: Այսինքն, վերոգրյալ իրավանորմերով նախատեսված՝ վիճակագրական տեղեկատվությունը ներկայացնելու համար անհրաժեշտ պայմանը՝ փոխադարձ առևտուրը, տվյալ դեպքում բացակայում է: Հետևապես, 2016թ. դեկտեմբեր ամսում ընկերության կողմից արտահանված ապրանքների (նմուշների) մասով վիճակագրական տեղեկատվություն ներկայացնելու պարտավորություն ընկերությունը՝ ի դեմս տնօրեն Արթուր Ներսիսյանի, չի կրել:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ ՈՒ Մ Է՝

Բեկանել ՀՀ ԿԱ ՊԵԿ աշխատակազմի իրավաբանական վարչության պետի 09.03.2017թ. թիվ 346330/03 որոշումը և կարճել գործը:

Հանձնաժողովի նախագահ՝



Վ.ՄԻՐՈՒՄՅԱՆ